

Txirritola

ARAMAIO / Barikua / 2003ko azaroaren 14a / 85. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Astelehenean Farola Eguna ospatu zuten Andra Marin

UBANE MADERA

Hirugarren urtez, Farola Eguna egin dute San Martin bezperan. Besteak beste, eskolako zenbait ume atera ziren eskolan egindako faroltxoarekin kantuan.

San Martin Eskolako bi irakaslek, Pepek eta Laurenek, ekimen berezia asmatu zuten orain dela hiru urte: Farola Eguna. San Martin bezpera aukeratu zuten egun hori ospatzeko. Eta harrez gero, bereziki, umeek eta haien gurasoek ospatu ohi dute Farola Eguna. Aurten ere hala egin dute, astelehenean. Hala, alde zurretik, San Martin eskolako umeek nork bere faroltxoak egin zuen eskolan. Paperez egindako farola izaten da, makilatxo batek zintzilik ipinita. Eta haren barruan, kandela sartzen dute, antzina egiten zuten moduan.

Eguna iluntzen hasten denean, gura duten guztiek (gehienak umeak eta haien gurasoak izaten dira) Andra Marirako bidea hartzen dute. Han, sasoi honi dagokion moduan, gaztainak jaten dituzte, eta egun horretarako bereziki prestatuta duten kantua abesten dute. Hori egin eta gero, Ibarrara jaisten dira berriro.



ROSA MONDRAGON


Argazkian eskolako umeak ageri dira Farola Eguneako kantua abesten.

BESTETAN BAINO JENDE GEHIAGO

Kontatu digutenez, aurten jende dezente parte hartu du ekimenean. Aurreko bi urtetan baino jende gehiagok. Izan ere, orain arte eskolako maila batzuetako umeek parte hartu izan dute, baina, aurten, maila guztietako ibili dira Farola Egunean. Are gehiago, eskolako txikienetariko askok ere parte hartu dute, euren anai-

arreba nagusiekin. Eta, ume horiei laguntzen guraso mordoa joan ei da. Edozelan ere, eta nahiz eta egun horretako parte-hartzaile gehienak umeak izan, edozeinek parte har dezake.

Hauxe da kantatzen dutena: *nire farolaz noie, nire faroltxoan nirekin. Hotz eitxen badau, etxera noie, nire farol txikiak. Farola, ilargi, eguzki, izarra...*



Giro polita Partxis Lehiaketan

Pozik daude Txirritola Euskara Elkartekoak Partxis Lehiaketak izandako erantzunarekin. Kontatu digutenez, 42 lagunek parte hartu dute, eta oso giro ona izan zuten. Hain ona ezen lehiaketa bukatu ostean, batzuek partxisean jokatzeko segitu zutela. 16:30ean hasi zen lehiaketa eta pare bat orduz egon ziren jolasean. Nagusien mailan Alberto Azurmendik irabazi zuen (bigarren urtez); gazteen mailan, Lorea Oianguren, eta umeen mailan, Ekain Erizek. Zorionak guztiei!

Trikitilari Egunean jende asko elkartu zen plazan

U.M.

Buzkantzak ugari eta ardo beltza barra-barra banatu zuten zapatuan Kalejiran Trikitixa Taldekoek. Arrakasta izan du aurten Trikitilari Eguna, batez ere, eguraldi ona lagun izan dutelako.

Iluntzean hasita kalejira polita egin ahal izan zuten herriko trikitilariak zapatuan, Trikitilari Eguna ospatzeko. Antolatzailetako batek, Gurutze Uribarrenek, kontatu digun moduan, aurten eguraldia lagun izan dute, ez du ezuririk ezta hotzik egin ere; horren ondorioz, Kalejiran tal-

dekoek poliki ospatu ahal izan dute Trikitilari Eguna.

Trikiti eskolakoak kalejiran zebiltzan bitartean, taldeko beste batzuk herriko plazan egon ziren, buzkantzak eta ardo beltza herritarrei banatzen. Jende asko hurreratu zitzaie esan digute, eta jendea gustura egon zela, giro politean.

Askari goxoaren ostean, sei bildotsen zozketako zenbaki irabazleak atera zituzten. Honako hauek dira: 3.771, 2.902, 3.681, 1.591, 3.183 eta 3.550.

Hortaz, zozketarako txartelen bat izanez gero, ondo begiratu ezazue zenbakia, akaso bildotsen bat tokatu zaizue-eta.



KALEJIRAN TRIKITIXA TALDEA

Kalejiran Trikitixa Taldeko trikitilari mordoa ibili zen zapatuan soinua jotzen.

LABUR

Datorren astean osoko bilkura egingo dute

Martitzenean herriko patroiren eguna izan zen. Eta haren izenean, herritar askok jai hartu zuten, eskolako umeek eta Aramaioko Udaleko langileek barne.

Bestalde, eta Udaleko kontuak aipatuz, datorren eguaztenean, hilak 19, azaroari dagokion ohiko osoko bilkura egingo du udalbatzarra. Baina, artikulua hau idaztean oraindik landu beharreko gaiak zehaztu barik zeuzkaten Udalean, hortaz ezin izan dugu gai-zerrenda horren berri eman.

TELEFONO JAKINGARRIAK

OSASUNA / LARRIALDIAK

Osasun etxea (txandak)	945 44 53 40
Botika	945 44 50 03
Udaletxea	945 44 50 16
Ertzaintza (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxa eta autobusak	945 44 50 33
Udal kiroldegia	945 44 53 35
Pestetxea	945 44 50 83
Zuiaiko Eskualdea	945 43 01 67
Suhiltzaileak (Zubillaga)	943 78 28 00

AUTOBUSORDUTEGIA

ARRASATE	ARAMAIO	GASTEIZ
07:00	07:15*	08:00
10:00*	10:15	
11:00	11:15	
12:00*	12:15*	13:00
15:15	15:30	16:15
17:20	17:35	
18:30*	18:45	
20:30	20:45	21:25
21:00*	21:15	

GASTEIZ	ARAMAIO	ARRASATE
	07:50	08:05
08:15	09:00	09:15
	10:15*	10:30
	11:15	11:30
13:10	13:55	14:10
16:20	17:05	17:20
	17:35	17:50
	18:45*	19:00
19:30	20:10	20:25

OHARRA: izartxoan duten orduetan eskaeraren araberako zerbitzua eskaintzen dute. Auzoetako bizilagunei zuzendutakoa da, eta autobusa erabili gura badute, bezperan deitu beharko dute honako zenbaki honetara: 629 54 59 23

OHARRAK

PARTIDU BIKAINAK

Pozik geratu dira oraingo astean Bañera elkarteko kideak bi taldeek lortutako emaitzekin; izan ere, nesken taldeak zein mutilen taldeak, biek hala biek garaipen garrantzitsuak ekarri dituzte etxera. Neskek 3-1 irabazi zioten Olabide taldeari eta mutilen 11-1 Canciller Ayala taldeari. Neskei dagokienez, nabarmentzekoa da gazte mailakoan kontra jokatu zutela, eurak baino nagusiagoen kontra. Eta mutilen dagokienez, sartutako gol mordoak ikusi besterik ez dago. Asteburuari begira, bihar jokatuko dituzte partidukoak. Kasualitatez, bi taldeek Lan eta Jolas izeneko taldea izango dute aurrez aurre. Eta bi partidukoak 11:00etan izango dira, Izarran. Nesken kasuan, Udala Pilotalekuan jokatuko dute eta mutilen ikastolako kiroldegian. Ea, bada, oraingoan ere emaitza onak ekartzen dituzten herrira.

ZINEMA

Oraingo domekan, *Las Cuatro Plumas* izeneko filma emango dute.



Hamarrekoa Gantzagako jaiei

UBANE MADERA

Gantzagarrak gustura gelditu dira jaiekin. Horrela kontatu digu antolatzaileetako batek. Eta gustura egoteko modukoa izan da, denetarik izan dute eta 25. urteurrenko ospakizunean. Nabarmentzekoa da, adibidez, Marsel magoak erakarri zuen jende pilo.

Hamarrekoa lortu dute aurten Gantzagako jaiek. Auzotarrek

eskerrak eta guzti eman zizkieten antolatzaileei. Izan ere, eta antolatzaileetako batek kontatu digun moduan, diruarekin ia guztia da posible, eta aurten jai politikak antolatzeko aukera izan dute, bereziki, 25. urteurren ospatzeko.

Barikuko txistularien kontzertuak jende asko erakarri zuen; zapatuan, besteak beste, Mus Txapelketa jokatu zuten; horrek ere jende asko erakarri ohi du eta aurten ere hala izan da, herritarrek ez zuten huts egin. Iban Astola eta

Luxio Elortza izan dira aurtengo irabazleak.

Domekan, goizean txirrindulari lasterketa jokatu zuten. Lau irabazle izan ziren: nagusietan, Martzel Elorriaga; eta auzotarren artean, Aitor Errasti. Eta, txikien mailan, Iñigo Pradera izan zen lehenengoa; auzoko aurrenekoa, berriz, Aitor Azkarraga-Urizar izan zen. Tute Txapelketa ere izan zuten. Gregorio Gallegok eta Valentin Beitiak irabazi zuten.

Horrez gainera, aipatzekoa da auzoko nagusiei egindako omenaldia hunkigarria izan zela, eta Aretxabaletako abesbatzari oparitxoa eman ziotela, urtetan dabilta-eta Gantzagako jaietan parte hartzen. Eta, esandako moduan, Marsel magoak jende asko erakarri zuen, nagusiak zein gazteak. Argazki erakusketarekin jendea gustura geratu zen eta eguneko ekitaldiez gain, gauean ere giro onak segitu zuen, ordu txikiak arte.

BOTEPRONTOAN/ Miren Aginagalde Arana · Bordatzailea

“Musuzapi bateko inizialak bordatzeko pare bat ordu ematen nituen makinaz; eskuz, egun osoa”

Askorendako ezaguna egingo zaizue Miren Aginagalde, gure elkarrizketa-laguna; are gehiago, zuetako askok Mirenek egindako lanak izango dituzue gordeta etxean. Izan ere, Miren Aginagalde *Txorokonekoa* izan da urte askoan Aramaion bordatuak egiten zituena. Gaur egun 85 urte ditu; eta oraindik ere egiten ditu halakoak, etxeokendako besterik ez bada ere:

Zer bordatzen zenuen?

Denetik. Adibidez, gerra denboran, hemen Mondragoeko batailoia bat egon zen: Dragoiak. Milizianoendako anagramak bordatzen nituen: *Batallon de Dragones* ipintzen zuen eta dragoi baten marrazkia zerman. Elizoste tabernako Mirenek ematen zizkidan lan haiek. Horrez gainera, ohe-jokoak, mahairako zapiak... Euskal dantzak egiten zituen dantza taldearendako bandera bordatu nuen; aguazilaren txapelarendako herriko armarrira...

Herriko bordatzailea zinen?

Bai, halako zerbait. Ezkontzen ziren bikoteendako apaingailuak ere bordatzen nituen... Nire ogi-beharrak zen. Horiek guztiak eskuz egiten nituen; eta gero, lan asko eskuz ezin nuenez egin, Gasteizen makinaz borda-



“Gerran, Arrasateko batailoia bat egon zen: Dragoiak; haiendako anagramak bordatu nituen”

tzen ikasi nuen. Adibidez, umeen eskolarako amantaletan inizialak makinaz egiten nituen. **Nork erakutsi zizun?** Eskolan asko erakutsi ziguten; Geografian horrenbeste erakutsi izan baligute... Gero, poliki-poliki nire kontura hasi nintzen. **Bakarrik egiten zenuen lan?** Bai, neuk bakarrik, etxean. **Zenbat urtean ibili zara?** 68 urterekin-edo utzi nuen, baina ordura arte lanean ibili nintzen. **Oraindik egiten duzu zerbait?** Bai. Baina, askorik ez. Orain, traputxoak-eta egiten ditut. Denbora pasatzeko. **Erakutsi diozu norbaiti bordatzen zure ondorengo izateko?** Loba nagusiak badaki, asko, gainera; eta beste lobak ere zerbait badaki. **Horrenbeste urtean horrenbeste lan egin ostean, baduzu buruan**

bereziki gustatu zitzaizun lanen bat?

Bai. Elizan aldare bat zaintzen nuen. Aste Santuan prozesioan ateratzen genuen irudia, Pietatea. Hark, gurutzetik zintzilik, izara dauka. Harendako oso lan polita egin nuen, dena eskuz eginda. Ordu mordoak eman nituen hura egiten, betiere, nire lanorduetatik kanpo. Akordatzen naiz zelan ordezkatzeko lana egiten zegoen maistra bat nire etxean egon zen apopilo, eta hark esaten zidan: “Ene, ¿cuándo vas a terminar eso?”

Bestela, lan berezien artean, lehen esandakoak daukat buruan: milizianoen txapelak... A! Eta, Aramaioko Pilota Txapelketarako txapeldunen txapelak ere bordatu nituen. Baina, bereziki, dantza taldeari egindako bandera daukat gogoan.

Sekula eraman izan duzu lehia- ketetara zeuk egindako lanik? Behin Pietatearen trapua eraman nuen, eta akordatzen naiz oso lore-ontzi polita erregalatu zidatela, irabazle izatearren. **Jendeak estimatzen du egiten duzuna?**

Ez ezazu pentsa jende guztiak estimatzen duenik, ez. Batzuek bai, baina beste askok ez.